

Deskobre Lalehan iha ó-nia laran



SERVISU

Bainhira temi liafuan “servisu”, labarik sira bele hanoin: “Ida ne’e, buat ruma ne’ebé ferik no katuas sira nian”, foin-sa’e sira ne’ebé estuda dala barak hateten katak laiha servisu, maibé iha Dom Bosco nia mehi, servisu katak hala’o didi’ak knaar simu, lahó baruk ka kritika, maibé hodi badinas no serbí maluk sira. Dom Bosco husu sira atu prepara an ba servisu abanbairua nian hodi la lakon tempu, hala’o knaar ida-idak nian (estuda, tulun iha uma, haloot sasán...) hanesan Maromak nia bolun ba konstrusaun sosiedade foun ida nian. No mós, iha fulan outubru ita selebra fulan misionáriu nian no durante tinan ida ne’e, hamutuk ho Bisentenariu, ita hanoin ba tinan 500 evangelizaun iha Timor. Tan ne’e bele dehan katak nu’udar sarani, ita-nia servisu mak haklaken Evanjellu.



ATIVIDADE:



Fatuk murak servisu nian, nabilan se labarik/foin-sa’e sira hala’o didi’ak sira-nia knaar loron-loron nian, ho pontualidade, metin ba empeñu ne’ebé sira promete, maski bele hetan susar. Bele propoin ba oratorianu sira atu prepara tabela ida, iha ne’ebé loron-loron hakerek sira-nia knaar loron nian; maski servisu ruma ne’ebé repete loron-loron (ez: hili ai, fase bikan, estuda...) di’ak liu hakerek nafatin iha tabela no kalan ida-idak sei fó valór (ho lialoos) ba knaar ida-idak ne’ebé nia hala’o. Remata semana oratorianu ida-idak bele avalia se nia tuir Dom Bosco nia espíritu ka lae.



Lista

Dom Bosco dehan katak “Oras liu neineik ba sira ne’ebé triste ka baruk; oras liu lalais ba sira ne’ebé haksolok” no ita halo esperiênsia katak bainhira ita partisipa ba eventu ruma ne’ebé ita la gosta, parese katak tempu la liu; maibé bainhira ita halo buat ruma ne’ebé ita gosta... tempu nunka to’o! Hamutuk ho ninia grupu, oratorianu sira bele halo lista ho atividade sira ne’ebé halo sira sai baruk (no hakerek tansa) eh atividade ne’ebé sira gosta no hakarak halo beibeik. Hafoin hamutuk buka dalan ida atu bele hadi’ak atividade sira ne’ebé halo sira sai baruk.



Haklaken Evanjellu mak servisu ida, katak...

Fahe oratorianu sira iha grupu no halo sira hanoin fraze ida kona-ba haklaken Evanjellu nu’udar servisu ida, hafoin fó jornál ida ba grupu ida-idak no oratorianu sira tenke tesi liafuan hodi forma fraze ne’ebé sira hakotu ona.



JOGU: BANKETE FESTA NIAN



Materiál: kanuru 1 ne’ebé kesi ho tali naruk liu (ba grupu ida-idak)

Bele fahe labarik sira ba grupu. Membru sira grupu nian hamriik besik malu. Oratorianu dahuluk ka’er kanuru no hatama husi nia faru nia kakorok no hasai husi faru nia liman, hafoin nia pasa kanuru ba kolega ne’ebé hamriik besik nia. Membru daruak halo hanesan no pasa ba kolega besik nia no tenke kontinua halo hanesan to’o hotu. Bainhira ema hotu iha grupu laran konsege halo hotu ona kanuru liu husi sira hotu nia faru, oratorianu ne’ebé ikus sei lori kanuru ba animadór. Grupu ne’ebé entrega ninia kanuru uluk, mak manán.



FILME



Iha fulan outubru ita hanoin ba misionariu sira, no iha Azia, misionariu ne’ebé ema hotu hatene mak **S. Francisco Xavier**, ne’ebé hakarak evangeliza rai Xina, maski, ikus mai, nia la to’o, maibé nia liu husi India, Indonesia no Japaun hodi haklaken ho aten-barani Jezús nia domin. Iha You Tube bele hetan filme badak ida (boneka) ba labarik sira; filme ida ne’e bele download tomak (33’) ka fahe ba parte 4 ho lian italianu (hakerek S. Francesco Saverio). Iha mós ida badak (19’) ho lian inglés (hakerek: S. Francis Xavier) ka film “Grace, Guts & Glory” (oras 1 resin)



Iha knua ida moris ferik ida ne'ebé nia tinan liu ona tinan 80. Loron ida nia sei suku faru-manas ida ba labarik kiak ida ne'ebé nia haree iha dalan bainhira "Anju Mate nian" mai atu bolu nia: "Ó-nia tempu hotu ona, Maromak bolu ó atu haksolok hamutuk ho Nia ba nafatin".

Ferik hatán: "Ha'u tenke ba agora kedas? Ita la bele hein uitoan? Ha'u presiza suku faru manas ida ne'e!"

Anju Mate nian husu: "Sei kle'ur?" no ferik simu fali: "Oras 2, karik 3". Anju Mate nian esprika: "La bele! Atraza oras 2 atu hatán ba Maromak nia ukun sei halo ó hetan kastigu, iha Purgatoriu, ba tinan 200 molok tama ba Lalehan". Ferik hakfodak: "Tinan 200!" Nia hanoin uitoan, hafoin: "La buat ida, ó la sente katak malirin liu? Se ha'u la halo hotu faru manas ida ne'e, labarik sei halo saida?" Nune'e, nia kontinua ninia servisu hodi haka'as an atu halo hotu lalais, maibé di'ak.

Liu tiha oras 2 nia hamriik: "Hotu ona, ita bele ba!". Sira na'in 2 sai hamutuk husi uma no la'o daudaun atu ferik ba Purgatoriu. Iha dalan, sira na'in rua hasoru Jezús ne'ebé husu ba sira atu ba ne'ebé. Ferik hatán kedas: "Ha'u ba atu simu kastigu ba tinan 200!". Jezús hateke ba ferik ho domin no Nia dehan ba Anju Mate nian: "Ó ba ona! Ha'u sei akompaña nia". Hafoin Jezús kaer ferik nia liman no la'o hamutuk ho Nia to'o Lalehan... tanba servisu hotu ne'ebé halo ba maluk sira, la'ós ba ita-nia an rasik, merese atu simu premiu, laós kastigu!



SANTU SALEZIANU: ALBERTO MARVELLI



Alberto moris iha tinan 1918; bainhira sei labarik hahú partisipa ba atividade oratóriu nian no grupu "Asaun Katolika"; iha ambiente ida ne'e nia dezisaun nu'udar sarani sai tasak: "ha'u nia programa mak liafuan ida de'it: santu". Nia hili Piergiorgio Frassati nu'udar modelu, no, hanesan beatu ida ne'e, Alberto iha kapasidade atu dada kolega sira ba di'ak, nia gosta desporto no uza bisikleta ba paseiu, maibé mós ba ninia atividade sira karidade nian. Nia estudu nu'udar insenieru: durante tempu funu nian, bainhira bomba monu beibeik iha ninia sidade, ho aten barani nia halai fó tulun ba sira ne'ebé hetan kanek, assiste sira ne'ebé iha agonia laran, tulun kiak sira hodi buka sasán no aihan, hafoin, ho ninia bisikleta, lori buat hotu ba sira. Ema hotu hatene nia nu'udar trabalhador karidade nian. Bainhira funu hotu ona, aministradór lokál no povu hili Alberto nu'udar asesór, maski nia tinan 26 no nia la tama partidu ida, maibé sira hotu rekoñese servisu maka'as ne'ebé

Alberto halo ba sira ne'ebé presiza. Iha ninia kadernu ki'ik-oan, Alberto hakerek: "Serbí mak di'ak liu duke halo ema seluk serbí ha'u. Jezús mós serbí"; ho espíritu ida ne'e nia hala'o ninia servisu iha aministrasaun. Iha tinan hanesan Amo Bispo bolu nia, nu'udar lider ba Laureadu Katoliku, no, hamutuk ho katoliku seluk, nia sai fundadór ACLI nian (kooperasaun ba trabalhador sira). Nia hakerek: "Servisu nafatin, nafatin, labele deskansa eh la halo buat ida. la bele lakon tempu." Maski ema ativu liu, nia akompaña atividade hotu ho orasaun kle'an; nia hakerek: "Ema hateke mai ha'u nu'udar ema ativu, ne'ebé soi atu hatudu nu'udar modelu, maibé ha'u la'o namkari, hanesan ventuiña ida. Karik tanba ha'u-nia servisu barak, karik tanba preokupasaun materiál oras ne'e nian no futuru nian? Ha'u tenke toman atu ezamina ideia ida-idak, atu estuda, medita no hanoin fali. Maromak haraik mai ha'u matenek ida, vontade ida no neon ida: tan ne'e ha'u tenke uza sira, treinu sira no halo sira funsiona!"



ORASAUN



Na'i Jezús, tulun ami atu hamoris hakaran atu partisipa ho ksolok ba misaun *ad gentes*. Keta husik situasaun sira na'ok ksolok evanjelizaun nian! Tulun ami atu tama kle'an iha ksolok Evanjellu nian no atu haburas domin ida ne'ebé bele leno ami-nia vokasaun no misaun. Halo ami hanoin fali ba Jezús nia domin ne'ebé uluk hamanas ami-nia fuan, atu ami bele kontinua ho ksolok. Ami hakarak horik iha Ita, halo Ita-nia hakaran, fahe ami-nia fiar, esperansa no karidade ho ema seluk.

Maria, ita mak ami-nia modelu evanjelizadora ne'ebé haklaken ho haraik an no ksolok, tulun Kreda atu sai uma ba ema barak, inan ba povu hotu atu bele hari'i mundu foun ida.

husi Amo Papa Francisco nia mensajen ba Loron Misionáriu Mundiál